
Saksnr: 2021/4279-1
Saksbehandlar: Åge Avedal

Saksgang

Utval	Utv.saksnr.	Møtedato
Hovudutval for kultur, idrett og integrering		25.03.2021

Tilskot frå posten Ymse barne- og ungdomsføremål. Mellombels endring av vurderingskriteria og avsetjing av midlar

Forslag til vedtak

1. Ordninga tilskot til drift av regionale barne- og ungdomsorganisasjonar blir lyst ut med søknadsfrist 15. april 2021. Vestland fylkeskommune set av 2 002 000 kr i tilskot til drift av regionale barne- og ungdomsorganisasjonar i 2021.
2. Ved utrekning av støtte til organisasjonane frå tilskotsordninga blir medlemstal for 2019 eller 2020 lagt til grunn, saman med dei andre vurderingskriteria i ordninga. Fylkeskommunen legg det høgste medlemstalet frå dei to åra til grunn, for å kunne redusere tap i tilskot som følgje av koronapandemien.
3. Ordninga tilskot til regionale ungdomsparti blir ikkje lyst ut i 2021.

Samandrag

Dei regionale frivillige barne- og ungdomsorganisasjonane gjer gjennom aktivitetane sine eit viktig arbeid for å fremje medverknad, inkludering, deltaking, engasjement og demokrati for barn og ungdom. I 2020 vart det tildelt i alt 1 752 000 kr gjennom ordninga tilskot til drift av regionale barne- og ungdomsorganisasjonar. Fylkesdirektøren vil styrke ordninga ved å auke søknadspotten til 2 002 000 kr i 2021. Ein del frivillige organisasjonar har hatt medlemsnedgang som følgje av koronapandemien, og fylkesdirektøren tilrår at det høgste medlemstalet frå åra 2019 eller 2020 blir lagt til grunn ved utrekninga av tilskot, som ei mellombels endring i 2021, for å dempe negative verknader av pandemien. Fylkesdirektør tilrår at tilskot til regionale ungdomsparti, som i 2020 hadde midlar frå same budsjettpost som tilskot til drift av regionale barne- og ungdomsorganisasjonar, ikkje blir lyst ut i 2021. Dette i tråd med budsjettvedtak gjort i fylkestinget desember 2020.

Per Morten Ekerhovd
fylkesdirektør

Ronny Skaar
seksjonssjef

Saksframlegget er godkjent elektronisk og har difor inga handskriven underskrift

Saksutgreiing

Bakgrunn for saka

Fylkestinget har i 2021 sett av i alt 2 002 000 kr i tilskot barne- og ungdomsorganisasjonar frå budsjettposten Ymse barne- og ungdomsføremål.

Hovudutval for kultur, idrett og integrering vedtok i møte 3. april 2020, sak 41/2020, [retningslinjer for ordninga tilskot til drift av regionale barne- og ungdomsorganisasjonar](#). Hovudutvalet vedtok i møte 4. juni, sak 90/2020, [retningslinjer for ordninga tilskot til regionale ungdomsparti](#). Begge tilskotsordningane hadde i 2020 midlar gjennom posten Ymse barne- og ungdomsføremål. Det vart i 2020 løyvd 1 752 000 kr i tilskot til drift av regionale barne- og ungdomsorganisasjonar. Det var sett av 400 000 kr til ordninga tilskot til regionale ungdomsparti i 2020. 329 966 kr vart løyvd frå ordninga, då ikkje alle ungdomspartia søkte.

I budsjettet 2021 står m.a. følgjande tekst om posten Ymse barne- og ungdomsføremål:

Dei regionale ungdomspartia får tilskot til drift via staten, og det vert gjort framlegg om at ordninga i fylkeskommunen ikkje blir vidareført. Midlane i tilskotsordninga til ungdomsparti vil bli fordelt til regionale barne- og ungdomsorganisasjonar som ikkje mottek driftsstøtte gjennom andre tilskotsordningar

Fylkesdirektøren gjer derfor framlegg om at tilskot til regionale ungdomsparti ikkje blir lyst ut i 2021, og at alle midlane blir tildelt som tilskot til drift av regionale barne- og ungdomsorganisasjonar. Dette vil styrke ordninga med i alt 250 000 kr.

Dei frivillige organisasjonane i Vestland har opplevd korona-pandemien som utfordrande. Dette kjem mellom anna fram i ei [spørjeundersøking som Vestland fylkeskommune gjennomførte i desember 2020](#). Enkelte organisasjonar melder at dei har opplevd medlemsnedgang under pandemien. Derfor tilrår fylkesdirektøren at utrekninga av tilskot til dei regionale frivillige barne- og ungdomsorganisasjonane blir gjort på bakgrunn av det høgste medlemstalet dei to siste åra, 2019 eller 2020, saman med dei andre vurderingskriteria i ordninga.

Barne- og familiedepartementet har gjort eit liknande grep når det gjeld grunnstøtta til barne- og ungdomsorganisasjonane nasjonalt, gjennom ei [mellombels forskrift som gjer det mogleg å ikkje legge 2020 som grunnlagsår ved behandlinga av søknadene](#).

I søknadsskjemaet for ordninga blir organisasjonane bedt om å legge inn medlemstal for både 2019 og 2020, slik at det blir mogleg å bruke det høgste av desse tala ved gjennomgangen av søknadene.

Vedtakskompetanse

Hovudutval for kultur, idrett og integrering, jf. pkt. 3 i reglement for folkevalde organ og delegering.

Vurderingar og verknader

Økonomi:

Forslaget er i tråd med vedtatt budsjett for Vestland fylkeskommune 2021.

Klima:

Ikkje relevant.

Folkehelse:

Ordninga tilskot til drift av regionale barne- og ungdomsorganisasjonar er eit verkemiddel for å styrke organisasjonane sin aktivitet, inkludering og medverknad frå barn og unge. Å vere deltakar og/eller frivillig i organisasjonar gir positiv effekt på folkehelsa.

Utviklingsplan for Vestland 2020-2024 (Regional planstrategi):

Aktivitetane i barne- og ungdomsorganisasjonane er vektlagt i dei regionale kulturplanane for Sogn og Fjordane og Hordaland.

Barne- og ungdomsorganisasjonane sitt arbeid står opp under utviklingsplanen for Vestland 2020-2024, spesielt

- punkt 3.1. Vestland skal utvikle menneskevenlege og levande lokalsamfunn basert på stadeigne ressursar og kvalitetar
- punkt 4.1. Vestland skal fremje opne og inkluderande arenaer for deltaking i kultur, frivillig arbeid og sivilsamfunn
- punkt 4.3. Vestland skal sikre deltaking gjennom trygg oppvekst, utdanning og livslang læring

Konklusjon

Fylkesdirektøren ser at arbeidet til dei frivillige barne- og ungdomsorganisasjonane er viktig for ungdomsmedverknad, inkludering, deltaking og utvikling av aktivitetar i lokalmiljøa. Koronapandemien har vore utfordrande for dei frivillige organisasjonane. Fylkesdirektøren tilrår at støtta til dei regionale barne- og ungdomsorganisasjonane blir auka i 2021, og at det blir høve til å bruke medlemstal frå 2019 eller 2020 som grunnlag for utrekning av støtta. Fylkesdirektøren foreslår at tilskot til regionale ungdomsparti ikkje blir lyst ut i 2021, då ungdomspartia mottek statsstøtte, og for å følgje opp tekstformuleringane knytt til posten Ymse barne- og ungdomsføremål i budsjett 2021.